

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA AMATA MUAMUA

1 – 4 Tausaga



AUKUSO - TESEMA

2023

**MATAUPU VASEGA AMATA MUAMUA
AUKUSO 06, 2023—TESEMA 17, 2023**

ASO SA: AUKUSO 06, 2023

MATAUPU: “O IESU O LE LEOLEO MAMOE LELEI.” (Jesus is the good shepherd)

TUSI FAITAU: IOANE - 10: 11-16

SINI: Ia iloa e tamaiti e moni lava e alofa fa’amaoni Iesu i ona tagata pei ona alofa o le leoleo manu i ana mamoe.

FESOASOANI MO LE FAIAOGA:

E lelei pea ona faia la outou sauniuniga mo le 30-40 minute mo le tatou vasega. Tapena nai ata ua outou saunia e fa’amanino lelei ai i le fanau le tatou mataupu o le a latou fa’alogologo iai pe a fa’amatalaina, ua sili fo’i lea.

TAULOTO: “O Iesu, o le leoleo mamoe lelei.”

FESOASONI MO LE MATAUPU:

O ai ua va’ai i lenei manu o le mamoe? O le manu lenei o le mamoe, o se manu e tele ona fulufulu. O se manu filemu, o se manu foi e lelei tele i le ‘ai. e usita’i tele le mamoe i le tagata o lo’o va’aia ma leoleoina i latou. O le tagata lea na te ta’ita’i ma ave mamoe i le auvai e fa’ainu, e ave i se mea o iai se vao lelei e aai ai, o ia o le leoleo mamoe. O le mea lava e savali iai le ta’ita’i, po’o le leoleo e ave iai le lafu mamoe, e mulimuli uma foi iai mamoe.

Tamaiti, e fa’apena lelei lava lo tatou Ali’i Fa’aola o Iesu. O ia na te leoleo ma ta’ita’i tatou uma i mea e manuia ai tatou. O Iesu, na te fafaga mai tatou i le Tusi Paia, ma fa’ainu tatou i lona Agaga Paia, ina ia tatou mao’ona fa’a-le-agaga. Tamaiti, e lelei tele lo tatou leoleo, o Iesu Keriso o ia o le leoleo lelei.

“Jesus said, I am the good shepherd and the good shepherd gives up his life for his sheep.”

GALUEGA FAATINO – Ia taumafai e faatino gaoioiga a le leoleo mamoe ia fiafia ai tamaiti. O le latou vaega lea mo le mataupu, faatasi ma faiaoga e fai ma leoleo.

A’OA’OGA: Ia faataua inai fanau le lelei o Iesu i lona tulaga faaleoleo ma taitai I tatou I le manuia. Saunia pea e lau susuga nisi aoaoga faigofie mo e fanau faamolemole.

PESE: O lau tapenaga mai I le vaiaso, e saunia ai ma se pese faigofie mo le mataupu o le nei aso.
////////////////////////////////////

/

ASO SA: AUKUSO 13, 2023

MATAUPU: “IESU MA LE FAFINE SAMARIA.” (Jesus and a Samaritan woman)

TUSI FAITAU: IOANE - 4: 7-11

SINI: Ia iloa e tamaiti le mea sa tupu i le talanoaga a Iesu ma le fafine lea.

FESOASOANI MO LE FAIAOGA:

1. E lelei lava ona fuafua le tou sauniuniga i taimi ua fa’atulaga mo a tatou A’oga Aso Sa i le 30 – 40 minute i le vasega.
2. Saunia ni ata e fa’amalamalama atili ai tagata, a maua se video tape e fa’amaimoa ai le vasega ua manaia tele.
3. A’oa’o iai se pese talafeagai lelei ma le mataupu.

FESOASONI MO LE MATAUPU:

Fai mai e alu atu le fafine Samaria e utu vai, o nofonofo Iesu i luga o le gutu o le vaieli. Ua fia inu Iesu, ae leai se asu e mafai ai ona asu a’e se vai ona e maulalo le mea e asu a’e ai. Ona talanoa lava lea o Iesu ma le fafine lea ma fai atu iai Iesu, aumai sina vai se’i inu ma ia, aua e iai le asu a le fafine lea na sau e utuvai. Sa tali le fafine, e leai ni mea e feaveaia a Iutaia(Iesu) ma Samaria(fafine). O lona uiga e le mafai ona inu Iesu i se vai e avane e le fafine Samaria. Ua fai atu le Ali’i, maumau pe ana

ua e iloa le tagata lea ua fai atu ua fia inu i se vai. Va'ai oe tina, a ou inu i le vai lea e te asu a'e, e toe lagona foi lou fia inu, ae afai e te inu i le vai ou te avatu i ate oe, e te le toe fia inu. Ua manatu le fafine, ua lelei tele lea mo ia, aua e le toe lagona ai le fia inu so'o, toe sefe ai lona toe sau so'o e utu vai i lenei vaieli mamao. Ua ta'u atu e Iesu i lenei fafine, o le vai ou te avatu ia te oe, o le ola e le uma. o le talanoaga lena a Iesu ma le fafine Samaria sa fai i luga o le vaieli.

Jesus sat down besides Jacobs well because he was tired from traveling. A Samaritan woman came to draw water from the well. Jesus asked her, would you please give me a drink of water? The woman said, you are a Jew, and I am a Samaritan woman, Jews and Samaritan won't have anything to do with each other. Jesus said to her, you don't know who is asking you for a drink. If you did, you would ask me for the water that gives life. The water I give is like a flowing fountain that gives eternal life.

GALUEGA FAATINO –

1. Afai e maua ni nai ata o lea talanoaga e valivali ai le fanau ua lelei tele lea.
2. Afai e leai, ona taumafai foi lea e faatino e tamaiti le talanoaga, ae faataitai e outou faiaoga upu o le talanoaga, ae mulimuli ma faataitai atu le fanau.
3. Ia vaelua le vasega I vaega e lua, o tamaitai e faataitai I upu a le fafine, ao tama e faataitai I upu a Iesu.
4. Fa'amolemole ia fa'amalamalama faigofie ni nai upu o le tusi faitau i tamaiti.

A'O'A'OGA: Aua le aiu ae ia fiafia e foai ma le alofa. Ua na o Iesu e malie ai le fia inu faale afafa o tagata. Faaopoopo e lau susuga nisi aoaoga faigofie mo le fanau, aua foi le tele.

PESE – O lau Susuga lava le tapenaga os e pese faigofie mo le fanau e fiafia ai I latou I le faaiuga o le mataupu.

Malo le onosai, manuia le Aso Sa.

////////////////////////////////////

ASO SA: AUKUSO 20, 2023

MATAUPU: “E ALOFA IESU I TAMAITI.” (Jesus loves the children)

TUSI FAITAU: MAREKO - 10: 13-16

SINI: Ia iloa e tamaiti e alofa tele Iesu i tamaiti uma pei o latou.

FESOASOANI MO LE FAIAOGA:

1. E lelei lava ona fuafua le tou sauniuniga i taimi ua fa'atulaga mo a tatou A'oga Aso Sa i le 30 – 40 minute i le vasega.
2. Manaia tele ae atoatoa lelei mea e fa'atino ai lenei mataupu i tamaiti fa'apei o nai ata o Iesu o lo'o sagisagi fiafia atu i tamaiti.
3. Fuafua lelei se pese fetau lelei mo le mataupu

FESOASONI MO LE MATAUPU:

Tamaiti, o le tala o le a outou fa'alologologo nei iai, o le tala i le “Alofa o Iesu i tamaiti.” Fai mai na o'o i le tasi aso, ua aumai e matua a latou fanau se'i feiloai ma talanoa ma Iesu. Peita'i, ua vavao pe taofi e so'o o Iesu. Fai mai le 'au so'o o Iesu, aveese tamaiti aua le o'o atu pe aua le avea i le mea o lo'o iai Iesu. Ua mafua ia manatu o so'o o Iesu, ona o le laiti o tamaiti pei lava o outou. Ua manatu so'o o Iesu, e le tataua ona o tamaiti pei o outou ia Iesu. O le mea lena sa ita tele ai Iesu. Ua fai atu Iesu i ona so'o, “Ina tu'u maia o tamaiti e omai ia te a'u, aua le vavao ia i latou.”

Sa omai tamaiti ma feiloai ma Iesu, ma ua fa'amanuia atu Iesu i tamaiti pei o outou. Va'a tatou i le alofa tele o Iesu i tamaiti laiti, a ea? ua ia fai atu i ona so'o, e tu'u mai tamaiti e omai ia te Ia.

The disciples of Jesus thought the children were not important enough to claim the Master's attention. So when Jesus heard this, he became angry. He said to his disciples, “Let the children come to me, don't stop them.” Jesus himself took these children just like all of you in his arms and blessed them. Jesus loves the little children.

GALUEGA FAATINO – Ou te taofi lava o le faaapgaina o fanau e faatino le tala, o se fesoasoani tele lea e ono manatua ai lenei tala taua mo I latou.

2. Fa'aaoga fanau ma le gagana faigofie o aso uma e manino ai le talanoaga I le tusi faitau.

3. Ia amata ona faalogo tamaiti o tala ia a le 'au so'o, a'o tala ia a Iesu, ma le motu o tagata na lolofi ane e ave a latou fanau ia Iesu, ma faapena ai lava le faatinoga.
4. Manatua e mulimuli le fanau ia te outou faiaoga, ona e laiti tamaiti.
5. E leai se leaga pe a faatino e sili atu ma le faalua poo le faatolu foi, e fua I le taimi. Manatua aua le tele le taimi e tau faamatala le tala I fanau ia, a ia tele le faatinoga.
6. E le taofia pea afai e ese foi sau tapenaga I le vaega lea o le mea taua ia fiafia tamaiti, ma aiaina la latou faalogo I le tusi paia.

PESE: Jesus loves the little ones like me, me!

A'OA'OGA: O le ma'ea o le lesona o le a faigofie ai ona e maitauina se a'oa'oga faigofie mo le fanau, ia aua le tele a ia maua se tasi mo i latou a'o tutupu a'e. Saunia pea e lau susuga lea vaega fa'amolemole.

Faafetai le faamalolosi, malo le onosai



ASO SA: AUKUSO 27, 2023

MATAUPU: FESILI MA TALI

SINI: Ia su'esu'eina o latou mafaufau i mataupu ua uma ona a'oa'oina, ma toe faamanatu ia I latou. E le afaina pe a toe faamatala ia tala faamolemole. Aua le fiu gofie a ia maua pea le onosa e laiti le fanau.

Fesili:

1. O ai le leoleo mamoe lelei?
 - a. O Iesu
2. Fa'afia ona alofa le leoleo mamoe i mamoe?
 - a. Fa'atele
3. O ai ua fa'atusa iai le leoleo mamoe?
 - a. Iesu. O le a I ai foi ma nisi tali a le fanau, aua le faaseseina.
4. E tatau ona usita'i mamoe i le leoleo?
 - a. Ioe, e tatau ona usita'i
5. Sa ave e le fafine Samaria se vai e inu ai Iesu?
 - a. Leai
6. Sa mana'o le fafine Samaria i le vai e ave atu e Iesu mo ia?
 - a. Ioe, e mana'o tele
7. E alofa Iesu i tamaiti pe leai?
 - a. Ioe
8. E fiafia Iesu ma alofa i tamaiti ulavavale?
 - a. E leai
9. E fiafia lou tina pe a e fa'alogogata?
 - a. E leai
10. E fiafia lou tama pe a e usiusita'i?
 - a. Ioe, e fiafia tele

Ia faaiu I ni nai pesepesega a le fanau e faauma ai le mataupu o lenei Aso Sa, ia taumafai lava ia fiafia tamaiti I taimi o le aoga.

Manuia tele le Tapuaiga



ASO SA: SETEMA 03, 2023

MATAUPU: “ASO SA O LE TALALELEI”

TUSI FAITAU: LUKA - 16:15

SINI: Ia iloa e tamaiti le mea taua na ala ai ona fa’amanatu pea lenei Aso Sa i le Ekalesia.

FESOASOANI MO LE FAIAOGA:

1. O lenei Aso Sa fa’apitoa ma lona autu, o le a le taofia ai le mataupu mo le tatou vasega.
2. Lelei tele ae fa’atino e tou susuga i faiaoga, sina va’aiga mo lenei lava Aso Sa fa’apitoa.
3. Saili lelei ni nai pese talafeagai mo le mataupu.

FESOASONI MO LE MATAUPU:

Talofa tamaiti, o ai na te ta’u maia, o le a le mea taua na tupu i lenei Aso Sa? Lelei tele, e faigata mo outou, ae faalogo lelei aua e taua mo outou pe a matutua outou, a ea? O le Aso Sa lenei, e fa’amanatu ai le taunu’u o le talalelei i Samoa.

Fa’alogo lelei, o le a fa’amatala le tatou mataupu. O le Ali’i o Iesu, sa talanoa i ona so’o ma fai atu, “O atu ia outou i le lalolagi uma, ina tala’i atu ai le tala lelei i tagata, i isi nu’u, o i nisi atunu’u e ta’u iai le tala lea e mana’o Iesu e fa’asalalau, “O le Talalelei.”

O le talalelei tamaiti, o le tala e uiga ia Iesu. O le talalelei e le o se tala leaga. O Iesu sa fanau i le fale povi, ola i se olaga usiusita’i i ona matua, aemaise le Atua. Sa ola i se olaga lelei, sa ia fa’amalolo i tagata mama’i, sa ia alofa foi i so’o se tasi.

Manatua foi e tatou tamaiti, sa alalaga tagata Osana i le Alo o Tavita... ina ua o’o atu Iesu i totonu o Ierusalema. Ae na toe alalaga foi tagata, fa’asatauro ia te ia. Sa oti ma tu’u lona tino i le tu’ugamau. Sa toe tu manumalo mai le Ali’i o Iesu mai le tu’ugamau. Ina ua sauni le Ali’i e alu ese ma ona so’o, na mana’o lava e fa’asalalau ma tala’i atu i isi atunu’u ma isi tagata le tala e uiga i le finagalo o le Atua, lea na ia sau i le lalolagi e fa’atino. Lea na ia fai atu ai i ona so’o, “O atu ia outou I le lalolagi uma, ina talai atu ai le talalelei i tagata uma lava.

Le talalelei lea na sau ma le faifeau papalagi mai Peretania e igoa ia Ioane Viliamu ma nisi o faifeau na fesoasoani ia te ia, ma le ‘au malaga mai Tahiti ma taunu’u i samoa nei ma ta’u mai le TALALELEI e uiga I le fa’aolataga a le Atua pei ona saunia e Iesu Keriso.

Tamaiti, o le Aso Sa lenei, e fa’amanatu ai le taunu’u mai o le Talalelei e uiga ia Iesu I le tatou atun’u o Samoa.

GALUEGA FAATINO – Taumafai lava e faamasani le faalogo ma le tautala ale fanau I igoa o nisi o tagata na I ai I le oo mai o le tallelei I Samoa.

2. E pei, Ioane Viliamu, afai foi e gafatia nisi ua lelei tele, a ia totoa pea le faamamafa I le Talalelei ma lona uiga masani mo le fanau, o le tala I le faaolataga a le Atua I le Lalolagi.
3. E fautuaina lava ia faigofie mo tamaiti ona e laity, a tasi lava pe luau a lava ma totoe.
4. E sili foi I lou taofia pe afai ae maua e fanau le aofai o tausaga talu ona taunuu mai le tala lea I Samoa, ua lava lona ma sili atu.

A’OA’OGA: E leai se a’oa’oga sili atu nai lo le faalogao o le fanau o Iesu o le alii o le talalelei. Faafaigofie e lau susuga se aoaoga faamolemole mo lenei aso taua.

PESE – Saunia e lau susuga se pese mo le fanau faamolemole, aua le faigata.

////////////////////////////////////
/

ASO SA: SETEMA 10, 2023

MATAUPU: “O A’U O IOSEFA LO OUTOU USO” (I am Joseph your brother)

TUSI FAITAU: KENESE - 45: 1-5

SINI: Ia iloa e tamaiti sa alofa pea Iosefa i ona uso.

FESOASOANI MO LE FAIAOGA:

- E fetau lelei fo’i lenei mataupu ae taumafai outou faiaoga e fa’atino le tala lenei I le feiloa’iga a Iosefa ma ona uso i Aikupito.

- A fai foi e fa'amatala pei ona masani ai, e fautuaina ia fa'amalamalama pea i nai ata, ina ia va'ai tamaiti ma mulimuli i mea uma e aga'i iai le mataupu.

FESOASONI MO LE MATAUPU:

Tamaiti, o ai e iloa se tala e uiga ia Iosefa? Ioe, lelei tele, le tama sa lafo i totonu o le lua. Sa fa'atau atu pei se pologa, lelei tele. Fai mai, ua tele lava tausaga o nofo le tama lea o Iosefa I le nu'u lea o Aikupito sa pologa ai. a ua tou iloa tamaiti le mea ua tupu ia Iosefa? Ua avea e fai ma ta'ita'i i totonu o le fale o le tupu o Farao ona o lona lelei ma le fa'amaoni.

Ua tofia e Farao Iosefa e pule i oloa ma mea'ai a Aikupito, ona o le a sau le oge i tausaga o i luma, e le gata i nisi vaega o Aikupito ae fa'apena ma ona nu'u tuaoi.

Ua o'o I le tasi aso, ua alu atu le fa'atuga mea'ai(saito) a le isi aiga. Ua iloa mai e Iosefa o ona uso tonu lava tagata ia. A o le mea ua le manaia ua leiloa e nei tama, o lo latou uso lenei sa latou fa'atau tia'i ese atu pei se pologa. Sa fia iloa tele e Iosefa pe moni lana vaai, ma fesili atu loa i ona uso, po'o a mai lo latou tamā, o ia lava lenei o Iosefa lo latou uso. Iosefa e alofa. E alofa i ona uso tusa pe sa agaleaga mai ae alofa lava iai fa'atasi ma lo latou tamā. Sa le mautonu tama ia ona ua tete'i, aua e le o se tulaga lea sa mafaufau se isi o i latou e tu mai ai lo latou uso.

Joseph asked his brothers if his father was still alive. But they were too frightened to answer. He said to them, I am your brother Joseph, the one you sold into Egypt. Don't worry or blame yourselves for what you did. God is the one who sent me ahead of you to save lives

GALUEGA FAATINO – E lelei ona silasila totoa lau susuga I le tala ona e fai si umi, o le mea lea taumafai e faatino na o le feiloaiga a Iosefa ma ona uso, ma le tautinoga a Iosefa o ia lava o lo latou uso.

2. Afai foi e le o e na, afai e mau ni ata ona valivali lea e le fanau e faigofie ai.

3. Ua I lau susuga a le faiaoga metotia e faigofie ai le tala ma lona faamatalaina.

PESE – E saunia lava foi e lau susuga se pese faigofie mo le fanau faamolemole. O vaega uma o lau tapena mai le vaiaso.

A'OA'OGA: Tele a'oa'oga faigofie o le tala, ae fautuaina se tasi pe lua mo le fanau ua lava ma totoo lene mo I latou aua e laiti.

ASO SA: SETEMA 17, 2023

MATAUPU: "O LE PAPATISOGA O IESU." (The Baptism of Jesus)

TUSI FAITAU: MATAIO - 3: 13-17

SINI: Ia iloa e tamaiti ma malamalama le vasega I le papatisoga o Iesu e Ioane le papatiso.

FESOASOANI MO LE FAIAOGA:

- Ia saunia lau tapenaga I le va o le 30-40 minute
- O se mea ua talafeagai ma lelei tele ona saili ni ata mo lenei mataupu
- A maua pe a talafeagai le fa'aaogaina o se video ma se TV e fa'amatatata muamua ai le vasega, ae le'i fa'amatalaina le mataupu, ua manaia tele.

FESOASONI MO LE MATAUPU:

O Iesu le Mesia, o ia lea sa papatiso e Ioane le papatiso. Sa papatisoina Iesu i le vaitafe o Ioritana. Ina ua fai e Ioane le galuega o le papatisoina o Iesu, fai mai sa afio ifo le Agaga Paia o le Atua, ua fa'apepepe pei se lupe i luga o Iesu ma lagona e tagata le leo ua fa'apea mai, "O lo'u atali'i pele lena, ua ou fiafia lava ia te ia." O le papatisoga o Iesu, ua faia lava e Ioane o lana lea galuega. Sa fiafia tele Ioane ina ua papatisoina Iesu. Fa'apena foi I le Ali'i o Iesu, sa ia fiafia tele ina ua fai e Ioane lana galuega ma aofia ai ma ia (Iesu) I le galuega lelei lea ua fa'atino.

O le papatisoga o Iesu, o le fa'aailoga lautele lea i tagata ua amata I le Agaga Paia mea uma ua fa'atino ma faia e le Ali'i o Iesu. O ia (Iesu) o le ua fa'au'uina e le Agaga Paia e fa'ataun'u mea tonu uma lava.

John preached and called the people to turn away from their sins. He called the people of Israel to baptize. Those who wished to give expression to their repentance. Jesus was baptized by John in the Jordan River. In the time of Jesus baptism, the Holy Spirit of God was upon Him. The descent of the dove as Jesus came up out of the water was a sign that He was the one anointed by the spirit of God

as the servant of His people. A voice from heaven declared, you are my beloved son, in You, I am well pleased.

GALUEGA FAATINO – Taumafai I lau tapenaga mai le vaiaso ia maua ni ata e valivali e tamaiti, aemaise o le latou vaai ia feso’ota’i ma le tala o lo’o faamatalaina I mea na tutupu I lea taimi.

PESE – Tele pese e talafeagai mo le mataupu, ae sili atu lava se pese sa e tapenaina mai le vaiaso mo le mataupu o lenei taeao.

A’OA’OGA: O le a’oa’oga lelei lava mo le fanau ia faamasani le faalogo ma le vaai I ata po’o faatinoga o tala o le tusi paia, atoa foi ma le tautala i igoa ma upu faigofie mo lo latou matutua i tausaga.

Manuia le sauni atu I le tapuaiga

////////////////////

ASO SA: **SETEMA 24, 2023**

MATAUPU: **FESILI MA TALI**

SINI: E toe faamanatu ma toe faamausali I tamaiti nai a latou matau sa aoaoina I lenei masina. E le o le su’esu’eina po’o ai e sili, ae ia tofu si tamaitiiti ma si ana mea taua ua maua mai mataupu o le nei masina, a tasi lava ua matua lelei tele lea.

FESILI:

1. O ai e ona le Tala Lelei?
 - a. O Iesu
2. O ai na aumaia le Tala Lelei i Samoa?
 - a. O Ioane Viliamu
3. Tamaiti o le a le tala e fa’alogo ai pea tatou I le Aso Sa muamua o Setema?
 - a. O le Aso Sa o le Tala Lelei.
4. O le a le tusi e maua ai le Tala Lelei?
 - a. O le Tusi Paia
5. E maua se ola i le Tala Lelei?
 - a. Ioe
6. O ai le igoa o le tama sa fa’atau e ona uso e fai ma pologa?
 - a. O Iosefa
7. O fea sa pule ai Iosefa?
 - a. O Aikupito
8. Sa toe fetau Iosefa ma ona uso?
 - a. Ioe
9. Sa toe alofa Iosefa i ona uso?
 - a. Ioe, sa alofa tele iai Iosefa
- 10.Sa fa’amagalo e Iosefa ona uso?
 - b. Ioe
10. O ai sa papatisoina Iesu?
 - a. O Ioane le Papatiso
- 11.O fea le vai sa papatiso ai e Ioane Iesu?
 - a. O le vai o Ioritana

12.O le a le leo na lagona I le taimi na papatisoina ai Iesu?

a. O lo’u atali’i pele lena, ua ou fiafia tele ia te ia

13.Sa lagona e Iesu se fiafia I le galuega na fai e Ioane?

a. Ioe

14.O ai le igoa o le tamā o Ioane le papatiso?

a. O Sakaria

Faafetai le faamalolosi, malo le onosai, manuia tapenaga mo le Lotu Tamaiti

“OKETOPA 01, 2023 – OKETOPA 29, 2023”

*******MALOLOGA MO LE LOTU TAMAITI*******

////////////////////////////////////

ASO SA: NOVEMA 05, 2023

MATAUPU: “O LE TAGATA MANAOTELE” (A man who wanted more)

TUSI FAITAU: LUKA - 12:15

SINI: Ia iloa e tamaiti e le o le tele o le oa e fa’aolaina ai i luma o le Atua

FESOASOANI MO LE FAIAOGA:

- E lelei ona fai la outou sauniuniga pei lava ona masani ai le taimi o a tatou mataupu i Aso sa uma.
- Manaia tele ae maua nai ata e fa’amalamalama atili ai le mataupu i tamaiti
- Saunia se pese e fetai lelei ma le mataupu

FESOASONI MO LE MATAUPU:

Talofa tamaiti, fai fa’atasi le tatou mataupu, “O LE TAGATA MANA’O TELE.” O le a le uiga o le mana’o tele? Ia fa’alogo lelei. O le mana’o tele, o le naunau po’o le mana’o lea i mea uma, tusa lava po ua tele mea ia te ia, po’o le mana’o ia maua uma mea. o le uiga lena o le mana’o tele. Ia faigofie atili mo outou le fanau, o lou manao ia tele au lole I le isi tamaitiiti, na o le tasi lana lole, a ea? Sa lauga Iesu I le motu o tagata e to’atele I le tasi aso, ua ia a’oa’o atu i tagata e uiga i mea e tataua ona latou ‘alo ese ai. Sa fesili se tasi o le motu o tagata ia Iesu ma fai atu iai, Iesu ia e fai atu i lo’u uso, e vaelua mai lona tofi o mea sa fa’aputu a lo ma tama ma ma’ua ae le’i oti mo a’u. Tamaiti, masalo o lea tagata e tele ni ana tupe ma ni ona fanua. Ae sili ai le tele o tupe ma fanua a lona uso fua I le mana’o e fai iai Iesu e toe ave se isi vaega ma lona uso o lo’o mana’o mai. Peita’i, e ese le tali a Iesu, “aua le matape’ape’a, aua e le ola se tasi I le tele o ana mea ua ia te ia.”

Tamaiti, o le finagalo o Iesu mo tagata uma, o le a le mea ua e maua, talia ma le fa’afetai. Afai ua foai mai e Iesu tupe, lavalava, fale, fanua, ta’avale ma isi mea lelei e tele, ma manuia ai le aiga. O le a le isi mea e toe mana’o ai fua i se isi mea. Fa’afetai i mea uma ua maua I le alofa o le Atua, ae aua le so’ona mana’o, aua le mana’otele.

A man in a crowd said to Jesus, “Teacher, tell my brother to give me more and my share of what our father left us when he died.” Jesus, answered to the crowd especially to this man saying, “Don’t be greedy. Owning a lot of things won’t make your safe.”

GALUEGA FAATINO – Ia saga faamalamala i ni auala faigofie ma le gagana faigofie mo tamaiti, le uiga o le manaotele, ma le leaga e tupu mai ai.

2. E lelei foi ona o faatasi ma le faamalamalama I ai o le taua o le faamalieina I mea ua maua.

A’OA’OGA: O le leaga o le manaotele, ma le lelei o le faamalieina I mea ua maua mai le alofa faasoa o le Atua. Faamolemole ia faafaigofie le gagana e momoli ai lea vaega, ia masani le faalogo a tamaiti.

////////////////////////////////////

/

ASO SA: NOVEMA 12, 2023

MATAUPU : “O TAGATA E TOALUA NA FAU O LA FALE”

(Two men who built their houses)

TUSI FAITAU: MATAIO - 7:24-25

SINI: Ia iloa e tamaiti le lelei o le mea e tatau ona fausia ai i luga le fale

FESOASOANI MO LE FAIAOGA:

- E lelei ona tapenapena a outou susuga i faiaoga I le tatou mataupu pei lava ona masani ai
- E manaia tele ae maua nai ata mo lenei mataupu, po’o sina video e fa’amatala atili ai I le fanau le mataupu.

FESOASONI MO LE MATAUPU:

Tamaiti, o le tatou tala i lenei taeao, o tagata e to’alua na fai o la fale. Fai mai Iesu, o le tagata e poto, o le tagata lea ua fa’alogo lelei i upu a Iesu. Ua pei lava ia o le tamaloa sa fau lona fale i luga o le papa. O ai ua vaai i se papa? Lelei tele. O le a le isi upu e ta’u ai le papa? O le ma’a. Fai mai Iesu, e lelei le tagata e fau lona fale i luga o le papa, aua a sau le timu ma tafe mai le vai e le pau lona fale. Ona toe fai mai lea o Iesu, o le tagata valea, o le tagata lea e le fa’alogo. Ua fa’atusa I le tagata e fau lona fale i luga o le oneone. A timu ma tafe le vai ona malepe ai lea o le tulaga e tu ai lona fale. Aisea? Ona e vaivai ma māmā le oneone. O lona uiga tamaiti, o le eseesega o tama ia e to’alua, e lelei ma mautu le fale o le tagata sa fau i luga o le papa lona fale, aua e poto sa fa’alogo lelei. A’o le tagata valea, o le tagata le fa’alogo ia Iesu, ua pei lava ia o le tagata e tu lona fale i luga o le oneone a tafe mai le vai pe a timu, ona pau ai lea.

PESE: Tamaloa poto fau lona i luga o le papa

A’OA’OGA: Ua silafia lava e lau susuga se a’oa’oga lelei mo le fanau, ia faigofie I la latou faalogo, ma ia fiafia e pepese I le pese ua tu’uina atu.

Malo le onosai, faafetai le galulue



ASO SA: NOVEMA 19, 2023

MATAUPU: “FA’AFETAI I LE ATUA I MEA LELEI UMA.” (Thank you God for everything)

SINI: Ia iloa e tamaiti ona fa’afo’i le fa’afetai I le Atua ona o mea lelei uma.

FESOASOANI MO LE FAIAOGA:

- So’o se mea e te saunia e tuu i totonu o le ato e te fa’amatala ta’itasi i tamaiti o le vasega lona aoga, e mafua ai ona fa’afetai I le Atua mo lona fa’aaogaina
- Manaia tele ae mafai ona tu’u i se ato launiu ua lalaga lelei mea nei mo lau mataupu:
 - Esi
 - Atigi ipu popo
 - Oneone i se tama’i fagu
 - Fa’i mata
 - Fasi la’au mago
 - Afai e faigata mo oe ona faamatala, ia saunia pea e lau susuga ni mea faitino e maitauina gofie e fanau, e faamatala ai le uiga e tatau ai ona ola faafetai le tagata I le Atua

FESOASONI MO LE MATAUPU:

Tamaiti, o le vaiaso lenei I lona aso tofi, ua ta’ua o le Aso Fa’afetai. E fa’afetai ai le tagata kerisiano I le Atua ona o lana foa’i mai, ae sili ai lona tausia o le ola ma le malosia e maua e tagata uma i lea aso ma lea aso.

Tu’u i luga le atigi popo, fa’afetai I le Atua ona o le fa’aaogaina o le popo atoa. Sa valu ese lona penu ma tatau e maua ai le pe’epe’e e fai ai le fa’alifu. A’o lea fo’i ua maua lenei atigi popo e tafu ai le afi e tunu ai le i’a.

Ia auaua’i lava iai mea oi totonu o lau ato ma fa’aali i tamaiti se ia uma. ia iloa e le vasega e ao lava ona fa’afetai le Atua i mea uma ua maua e le tagata.
Tamaiti, e o’o lava i lou iloa faitau le tusi, pe ala fo’i i le taeao, pe moe I le po, ia aua ne’i galo ona e fa’afetai I le Atua ona o Ia ua e maua ai le manuia.

PESE: Thank you Lord, for your blessings

A’OA’OGA: Faamalosi I tamaiti aua le aoaoga aua nei galo le faafetai i le Atua i mea lelei uma ua tatou manuia ai.

Manuia le Aoga, manuia le Aso Faafetai

//

ASO SA: NOVEMA 26, 2023

MATAUPU: FESILI MA TALI

SINI: O le faamoemoe lava ia toe faamanatu I fanau a latou mataupu sa outou gapatia ai I lenei masina. Pe tasi pe lua ni nai mea taua ua maua e fanau ua sili atu lena I lo leai. Viia le Atua.

FESILI –

- 1. E lelei le mana’o tele?
 - a. Leai, e le lelei

- 2. Aisea e mana’o ai pea le tagata ia tele ana mea?
 - a. Ona o le fa’amalieina i mea ua maua
- 3. E fiafia Iesu i le tagata mana’o tele?
 - a. Leai

- 4. E lelei le fale a fau i luga o le papa?
 - a. Ioe, e lelei

- 5. Aisea e lelei ai le papa e fau ai le fale?
 - a. Aua e malos, e mautu

- 6. Aisea e leaga gofie ai le fale e fau i luga o le oneone?
 - a. Vaivai le oneone

- 7. O ai na te fa’aolaina le fa’i ma le ulu e toto i le palapala?
 - a. O le Atua

- 8. O le a le tatou tala e fai i le Atua i mea lelei ua foa’i mai mo i tatou?
 - a. O le fa’afetai

- 9. O ai e ana le ola ua tatou ola ai?
 - a. O le Atua

- 10. Tatou te fa’afetai i lena mea pe leai?
 - a. Ioe

Ia faai i ni nai pesepesega mo le fanau, e saunia ai i latou mo le tapuaiga o le Aso Sa.

//
/

ASO SA: TESEMA 03, 2023

MATAUPU: “UA FAAALI LE AGELU IA IOSEFA I LE MITI”

(The angel appeared to Joseph)

TUSI FAITAU: MATAIO - 1: 20-22

SINI: Ia a’oa’oaina tamaiti ina ia amata ona faalogo i le fa’aaliga na o’o ia Iosefa.

FESOASOANI MO LE FAIAOGA:

- E fautuaina lava lau susuga a le faiaoga e faitau lelei le tala lea ia Iosefa ma Maria I le mataupu muamua o le tusi a Mataio. O fuaiupu ua filifilia mo la tatou lesona i lenei taeao, o loo fa'amatala mai ai le fa'aali mai o le agelu ia Iosefa I le miti. Ua fa'ailoa mai ai ia Iosefa ina ia loto tele, aua le fefe e aumai Maria e fai mana ava aua o lana to e mai le Agaga Paia lea.
- O lo'o manino mai le fuaiupu 19, le manatunatu o Iosefa e fa'ate'a lemu ia Maria ina ua iloa ua to ia. Peita'i, o le fa'aali mai o le agelu ia Iosefa I le miti, ua iloa ai o le finagalo lava o le Atua ua to ai o ia. Ua valoia foi le fanau mai e Maria le tama tane, ma le fa'atonuga ina ia fa'aigoa ia te ia o Iesu. O lona uiga, o le Fa'aola! Aua o le a fa'aola e ia lona nuu ai a latou agasala.

FESOASONI MO LE MATAUPU:

Ia fa'amanatu le mataupu o le Aso Sa lenei: "Ua fa'aali le agelu ia Iosefa."

E lelei ona fa'amatala pea le tala ia Iosefa ma Maria. Ia ta'ua le taua o le miti aua o le auala lea e fa'aali mai ai le Atua i lana fanau. E lelei fo'i ona fa'ailoa le miti a Iosefa e uiga ia Maria. Afai e faigata mo tamaiti uiga tonu o le fa'aaliga ia Iosefa, a ia fa'ailoa pea le pepe o le a fanau mai ia Maria ma lona igoa o Iesu. O lona uiga: o le "Fa'aola", aua o le a fa'aolaina e ia lona nuu ai a latou agasala.

TAULOTO: "E fanau mai e ia le tama tane, e te fa'aioga foi ia te ia o Iesu".

PESE – Ua silafia lelei e lau susuga le uiga o le vaitau lenei ua agai atu i ai la tatou malaga o le tausaga. Ia saunia ai se pese faigofie e amata ona faailoa ai le agaga o le fiafia o le vaitau I nai fanau.

A'OA'OGA: O le a taoto atu lava I lau susuga se aoaoga faigofie mo tamaiti, e saunia ai le sauni atu mo le Kerisimasi.

Manuia le sauni atu I aso fiafia

ASO SA: TESEMA 10, 2023

MATAUPU: "O LE FANAU MAI O IESU" (The birth of Jesus)

TUSI FAITAU: LUKA - 2: 8-20

SINI: Ia iloa e tamaiti o Iesu lea ua fanau mai.

FESOASOANI MO LE FAIAOGA:

- O lenei mataupu e fautuaina lava a outou Susuga i faiaoga e fa'atino lenei mataupu mo le fanau. Ua manatu ai e lelei ona tu'u faatasi uma ai vasega amata muamua ma le amata lua, e faatino faatasi ai le mataupu lenei, mo le Aso Sa lenei ma le Aso Sa o lumanai, ina ia lelei ma matagofie le tapenaga a le fanau. E tu'u atu lava i a outou Susuga le faaogaina o le tapenaga a tamaiti i se vaega o le tapuaiga, pe a talafeagai ma le finagalo o le Susuga i le Fa'afeagaiga. O lo latou sao lena i lenei tala taua mo le tapuaiga a le aulotu, e tauluga ai aoga ma galuega o lenei tausaga na outou gapatia ai ma nai fanau. A'o le faamanatu lava lea ia totō i loto ma manatua i mafaufau o le fanau lenei tala taua o le Tusi Paia, pe a vaai ma faalogo pea i ai i gaoioiga ma vaaiga e faamatalaina ai lenei tala.

FESOASONI MO LE MATAUPU:

Leoleo Mamoe (1): Sole, se sōsō mai tatou fa'atasitasi atonu e maua ai sina mafanafana, ona ua malosi tele le malulu o lenei po.

Leoleo Mamoe (2): A'o la'u tala foi, ua leai se mea e toe pao, ua leai se toe fetagisi mai o lau lafu, ai ona ua mao'ona lelei.

Leoleo Mamoe (3): Manatua foi e oulua a putuputu le tao'oto a mamoe ma pipii le tino o le isi mamoe I le isi, e maua lelei ai le mafanafana. Masalo o le ala lea o le le toe pao o se mea. Ua filemu a mea uma I lenei po.

Agelu ua fa'aali i Leoleo Mamoe:

Agelu: “Aua tou te matata’u, aua fa’auta, ou te aumai ia te outou le tala lelei o le olioli tele, e o’o mai I le nu’u uma, aua o le aso nei ua fanau ai ia te outou I le a’ai o Tavita le Fa’aola, o ia o Keriso le Ali’i. O le fa’ailoga leni ia te outou, e iloa e outou le tama meamea ua aui I le ie, o lo’o taoto I le fale manu.”*(e lelei ae toalua ni teine e vaelua I ai le tautalaga lea)*

Leoleo Mamoe (1): Po’o le a ea leni fa’aaliga ia i tatou

Leoleo Mamoe (2): Sole, matua malosi le susulu mai o le la fetu

Leoleo Mamoe (3): O le tonu, e lelei le tatou agai i Sasa’e,vaai foi i le fetu la ua agai atu. E sili lo tatou mulimuli iai... E agai lava i Peteleema le alu a le fetu,... tatou o.

(o le solo leni ua alu i Peteleema, ua suia iinei o makoi)

Pese:

Va’aia le fetu, susulu mai le lagi
O le fa’ailoga o le afio mai o le alo e to’atasi
Va’aia le fetu, susulu mai le lagi
O le fa’ailoga o le pepe fou, o le alo e to’atasi

Ona o le alofa o le Atua I le lalolagi
Ua ia aumai ai lona atali’i e to’atasi
Ina ia le fano se tasi e fa’atuatua ia te ia
Aua o le fa’aola ia na valoia

**usu lava le pese seia taunu’u I le fale o manu. A’o Maria ma Iosefa ma le pepe o lo’o iai fa’atasi. Auaua’i ta’ito’atasi ma lana meaalofa I le pepe ma ifo iai.*

Makoi (1): O oe lea sa fa’aali mai e le fetu ua fanau mai. O la’u meaalofa leni mo oe, **o le auro**. O le fa’ailoga o mea sili, o mea lelei ua ou maua, ua ofoina atu mo oe le pepe ua fanau mai.

Makoi (2): O la’u meaalofa leni mo oe, o le **pulu lipano**. O le fa’ailoga ma le fa’atusa o mea mamā (pure). Ua ou ofoina atu mea mamā uma mo oe le pepe fou.

Makoi (3): O la’u meaalofa leni mo oe, o le **pulu muro**. O le fa’atusa ma le fa’ailoga o mea ua avatu atoa. Ua ou avatu uma, ma avatu atoa mo oe le pepe fou.

Pese:

Alalalga ia, pepese fiafia.....

FAAIUGA – Ia faailoa I tamaiti le agaga o le sauni o tagata I le vaitau ma le vaitaimi leni. O le ofoina mai o le meaalofa silisili a le Atua I le lalolagi, e alai a Iesu le pepe o le Kerisimasi.

IA MANUIA TELE LE KERISIMASI MA TAUSAGA FOU I LE MAFUTA MAI PE O LE ATUA
IA I TATAOU.

MANUIA LE TUUAGA MA LE MALOLOGA O LE A ALO ATU I AI, TATAOU FEILOAI I LE
2024, PE PULE ALOFA I AI LE ATUA.

FAASOLOGA O MATAUPU O LE TUSI

ASO/MASINA

MATAUPU

TUSI FAITAU

1. Aukuso 06, 2023

O Iesu o le Leoleo mamoe lelei

Ioane – 10: 11-16

2. Aukuso 13, 2023

O Iesu ma le fafine Samaria

Ioane – 4: 7 – 11

- | | | |
|--|---|------------------------------|
| 3. Aukuso 20, 2023 | E alofa Iesu I tamaiti | Mareko – 10: 13 – 16 |
| 4. Aukuso 27, 2023 | FESILI MA TALI | |
| 5. Setema 03, 2023 | Aso Sa o le Talalelei | Luka – 16: 15 |
| 6. Setema 10, 2023 | O a’u o Iosefa lo outou uso | Kenese – 45: 1 – 5 |
| 7. Setema 17, 2023 | O le papatisoga o Iesu | Mataio – 3: 13 – 17 |
| 8. Setema 24, 2023 | FESILI MA TALI | |
| 9. OKETOPA 01 – 0KETOPA 29, 2023, | MALOLOGA LOTU TAMAITI | |
| 10. Novema 05, 2023 | O le tagata manaotele | Luka – 12: 15 |
| 11. Novema 12, 2023 | O tagata e toalua na fau o la fale | Mataio – 7: 24&25 |
| 12. Novema 19, 2023 | Faafetai I le Atua I mea lelei uma | |
| 13. Novema 26, 2023 | FESILI MA TALI | |
| 14. Tesema 03, 2023 | Ua faaali le agelu ia Iosefa | Mataio – 1: 20 – 22 |
| 15. Tesema 10 & 17 | O le fanau mai o Iesu | Luka – 2: 8 – 20 |

**MANUIA TELE GALUEGA O LE FAAIUGA O LENEI TAUSAGA AOGA.
TATOU FAAMALOLOSII PEA MO LE VIIGA O LE ATUA.**



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org